



RESOLUCIÓN POLA QUE SE MODIFICA O PERÍODO PARA A COLOCACIÓN DE CORDAS COLECTORAS DE SEMENTE DO MEXILLÓN NO ÁMBITO DE COMPETENCIA DO DEPARTAMENTO TERRITORIAL DA CONSELLERÍA DO MAR NA CORUÑA

ANTECEDENTES

1. Con data do 6 de febreiro de 2026, a Federación de Asociacións de Mexilloeiros (FEMEX) solicitou autorización para adiantar o prazo de colocación de cordas colectoras ao 9 de febreiro de 2026.
2. O 27 de febreiro do 2026 solicitouse informe aos membros da Comisión do Mexillón sobre a solicitude de adianto do período de colocación das cordas colectoras; informando favorablemente Amegrove, S. Coop. Galega, Mejilloneros de Galicia, S.C.L. (Socomgal), Asociación de Mejilloneros Profesionales "A' Marxa", Organización de Productores de mejillón de Galicia (Opmega) e Asociacion Productores Mejilloneros Ria Nosa de Moaña.
3. O director xeral de Pesca, Acuicultura e Innovación Tecnolóxica emitiu informe o 4 de marzo de 2026, no que deixa constancia de que non observa ningún inconveniente en que se adiante a data de inicio para a colocación das cordas colectoras.

CONSIDERACIÓNS LEGAIS E TÉCNICAS

Primeira. O artigo 36 do Decreto 406/1996, do 7 de novembro, polo que se aproba o Regulamento de viveiros de cultivos mariños de Galicia, dispón: "*1. Poderán colocarse cordas colectoras de semente do mexillón sempre que o número total de cordas da batea non sobrepase a densidade e número máximo a que se refire o artigo anterior.*

2. Independentemente do recollido no punto anterior, no período que vai dende o 1 de abril ata o 30 de setembro, autorízase a colocación de cordas colectoras de semente do mexillón en bateas de modo que o seu número non sobrepase as 100 respecto ao máximo que lle corresponde á dita batea.

*Cando fenómenos medioambientais excepcionais alteren o ciclo normal de reprodución da especie, modificándose a época de fixación larvaria, a **delegación territorial** (agora departamento territorial), dentro do ámbito da súa competencia **poderá variar o dito período, previa petición da maioría de entidades representativas do sector e informe da correspondente unidade técnica administrativa.***





En todo caso, unha vez finalizado o período, o número de cordas axustarase ao que corresponda á batea.

3. As cordas colectoras, que terán libre un dos seus extremos, non poderán ter máis de cinco metros de lonxitude contados a partir da superficie do mar. Cada unha delas deberá estar claramente identificada mediante unha marca de color vermello intenso, na súa parte superior, dunha lonxitude mínima de 30 cm que a diferencia perfectamente das cordas de engorde.”

Segunda. O director xeral de Pesca, Acuicultura e Innovación Tecnolóxica emitiu informe o 4 de marzo de 2026 no que, en relación ao adianto do período establecido no artigo 36.2 do Decreto 406/1996, deixa constancia de que: *os informes de recontos larvários elaborados en colaboración co laboratorio de inmunoloxía (CINBIO) da Universidade de Vigo (UVIGO) e o Centro de Investigacións mariñas (CIMA) (<https://apromex.gal/recursos-apromex/>), non amosaron un incremento da presenza de larvas nas Ría Galegas ata a semana do 23 de febreiro de 2026, polo que non se xustificaba o adianto da campaña. Porén, esta situación ven de mudar na última semana, como se amosa na gráfica seguinte. Na última mostraxe do día 23 de febreiro observouse un incremento de larvas umbonadas (larvas U), o que fai pensar nun incremento da fixación das larvas cara mediados de marzo. Por iso, resulta axeitado adiantar o prazo de colocación das cordas colectoras, que requiren un período de 1-2 semanas previas para que na súa superficie se dean as condicións axeitadas para a fixación.*



Terceira. De acordo co citado artigo 36.2 do Decreto 406/1996, do 7 de novembro, polo que se aproba o Regulamento de viveiros de cultivos mariños de Galicia, a competencia para ditar a presente resolución correspóndelle á directora territorial da Consellería do Mar na Coruña.

En base ao exposto,





RESOLVO

1. Modificar o período no que se autoriza a colocación de cordas colectoras de semente do mexillón en bateas, establecido no artigo 36.2 do Decreto 406/1996, do 7 de novembro, de forma que, no ámbito de competencia territorial deste Departamento, as ditas cordas poderán colocarse **dende o 4 de marzo ata o 30 de setembro do 2026**.

A dita modificación do período de colocación das cordas colectoras queda suxeita ás seguintes condicións:

Primeira. Tal e como establece o artigo 36.3 do Decreto 406/1996, do 7 de novembro, as cordas colectoras no poderán ter máis de cinco metros de lonxitude contados a partir da superficie del mar. Estas cordas terán libre un dos seus extremos e deberán estar claramente identificadas mediante unha marca de cor vermella intensa, na súa parte superior, dunha lonxitude mínima de 30 cm que a diferencie perfectamente das cordas de engorde.

Segunda. Ao longo da campaña, os concesionarios, que se acollan a esta medida extraordinaria, deberán realizar a declaración do número de cordas colectoras que van colocar a través da aplicación informática MOVITIC. A declaración das cantidades de semente de mexillón captadas nas ditas cordas será realizada a medida que vaian retirando as cordas.

Terceira. En todo caso, para os efectos de realizar o correspondente seguimento técnico, os titulares dos viveiros deben colaborar co persoal da Consellería do Mar facilitándolles a información que lles sexa requirida.

2. Contra a presente resolución, que non pon fin á vía administrativa, as persoas interesadas poderán interpoñer recurso de alzada ante a persoa titular da Consellería do Mar, no prazo dun mes contado a partir do día seguinte ao da súa notificación, de conformidade co disposto nos artigos 121 e 122 da Lei 39/2015, do 1 de outubro, do procedemento administrativo común das Administracións Públicas.

A Coruña

A directora territorial na Coruña

P.A. (Resolución do 13 de maio de 2024)

O xefe do Servizo de Desenvolvemento Pesqueiro

Miguel Gómez Losada

